

東

華

錄

東華錄

康熙六十六

臣王先謙敬編

臣周倫蕃恭校

秋七月壬辰朔以布泰爲盛京刑部侍郎

由內閣學士遷

○甲午諭河道

總督張鵬翮歸仁隄便民閘等口俱已堵塞其毛城鋪迤下等口尙未堵塞將便民閘等口堵塞則毛城鋪等口所出之水由何處洩去必致散漫各處民受大害此關係緊要宜速籌一策○乙未

上召刑部侍郎常綬並員外郎費養古諭曰張鵬翮深悉河務條奏詳明但任事伊始卽如此嚴切後將難繼其所奏下椿處朕南巡時亦曾面諭于成龍今張鵬翮所奏如此方見朕言之當治河石料拋置水次以致衝沒者頗多于成龍監修河務當身立淤泥中竭力督催故人皆奮勉但彼偶離其地則屬員安逸是圖無

所顧恤矣且聞或於河岸斗峻處略加削直卽冒稱隄工者有之  
張鵬翮見奏事宜固爲詳明但彼所轄地方遼闊不得不分委屬  
員從來功效難以豫必爾等視河屢矣今觀此奏以爲何如常綬  
奏曰後效難於逆料誠如 聖諭○理藩院奏商南多爾濟等所  
奏策妄阿喇布坦遣人往青海台吉處等事無庸議 上曰此事  
目前觀之雖屬甚小將來大有關係該部擬以無庸議儻青海台  
吉等遣人以所奏聞事問商南多爾濟則商南多爾濟何以答之  
策妄阿喇布坦人甚狡猾其口稱往征第巴或因力不及而虛張  
聲勢或欲往征以此問會往彼處侍郎常綬等再行具奏○九卿  
等議覆河道總督張鵬翮奏修河工事宜應准行 上曰張鵬翮  
所奏黃河曲處挑挖使直則對岸險工可平此說良是所謂曲處  
挑挖使直非謂取直於隄外乃兩隄之間自四五里至十里廣狹

不一於此內曲者使直耳朕亦曾以此面諭于成龍于成龍之意甚忽視之朕不過暫往巡視于成龍乃久居河上之人毋論朕不能盡知卽所深知者亦不能強令所司曲從朕意今張鵬翮所奏與朕向時所見甚合朕凡事知者言之不知者不輕言卽今邳州呂梁諸處形勢如何並未親見若強以爲知必致辭窮伊桑阿馬齊爾等曾親到河工故能知之若未知者概以爲知可乎張鵬翮遇事精勤從此久任河務必能有益著照所議速行上又顧大學士等曰觀翰林官及庶吉士內有極貧者衣服乘騎皆不能備將此等查出何以施恩有益供職其丁憂告假回籍之翰林官庶吉士有生計艱難無力至京者著該督撫酌量資助令其來京又翰林官員專司文翰更無他事各省學道員缺應與郎中並差任滿之日仍各回衙門或掣籤或作何差遣爾等會同翰林院議奏

○己亥以胡會恩爲兵部右侍郎

由內閣學士遷

○河道總督張鵬副奏

清口已照式築壩下埽僅畱口門今糧船盡數過淮指日出口卽可煞壩且張福口引河挑成引出清水已至壩口止待煞壩便可開放入運其一應進貢以及差使官兵船隻不得擅自開放俟回空之時啟壩過完仍行堵塞從之○庚子大學士等遵旨以商南多爾濟等所奏青海事宜問侍郎常綬侍讀學士伊道郎中常明等回奏上曰此事稍覺遲延方奏到日卽爲行文甚好青海台吉亦屬失算何以先將己意洩漏但將來使照常款待禮遣使不敢構釁今以朕計之亦尙無妨朕巡幸蒙古之地頗多凡事朕皆熟悉策妄阿喇布坦人雖狡猾但由博羅塔拉至土伯特必經哈拉烏蘇等艱險之處路徑甚惡斷不能往伐何也策妄阿喇布坦素行奸惡故其附近哈薩克布魯特諸部皆相仇讐欲悉軍大舉

則路既難行且無畱護其妻孥者若兵單力薄斷難成事惟有奮  
激而行妻孥與俱幸而有濟則己無濟則有歸附土伯特之謀而  
已然策妄阿喇布坦奏書之意特張聲勢欲觀青海之動靜耳亦  
未必果欲爭戰也觀古趙充國所議各事良是應宜畱意○以舒  
輅爲內閣學士

由內閣侍讀學士遷

○壬寅河道總督張鵬翮奏臣恭奉

聖訓指授方略堵塞邵伯決口糧船即便通行此時運河各決口  
盡堵清水又引出乘時將運河淤墊處再加疏濬來歲糧船自可  
通行不至遲誤至於改載杪船雇募水手人夫恐糜費錢糧且由  
江入海從黃河海口進中河之處潮汐消長水勢不一風濤不測  
實屬難行下所司知之○乙巳翰林院掌院學士法良韓奕遵旨  
議此後各省學道缺出翰林官內自侍讀侍講以下開列職名仰  
候 欽點及翰林官內貧者月給銀三兩具奏 上曰翰林官所

學優長朕悉知之但其爲人尙未深悉難以簡擇此後學道缺出除告假在籍月期不論外較俸派出翰林貧者給銀之處著依議

○丙午以李成林爲河南布政使

由福建按察使遷

○壬子故振武將軍

甘肅提督孫思克覲回京師命皇長子允禔奠酒賜鞍馬二匹銀一千兩○癸丑賑淮揚所屬十五州縣○甲寅諭大學士等頃者問護孫思克喪之章京云孫思克之喪自甘州至潼關沿途軍民無不號泣相送孫思克在西陲時朕甚賴之因思甘肅地方緊要特命都統雷繼遵前往雷繼遵朕所素知騎射甚精人材優長將軍博霽莽依圖俱善前博霽自江甯赴西安時軍民哭送直至浦口彼若不善何能如此誠可謂將軍矣提督李林盛軍民亦無不稱善○乙卯諭大學士等觀九卿所議考試一事科道亦無不心服況今年會試所中大臣子弟俱多孤寒士子未能入彀如此欲

令人心服得乎張鵬翮李光地任學院時居官皆善彭鵬郭琇居官好著將鄭維孜滿晉慕琛等所奏及九卿會議事件盡行錄出差保舉筆帖式送示四人果否得當如何方能除去弊端永遠可守務令各抒己意詳議具奏四人居官優善持行清廉若徇大臣及科道情面不盡心審度據事直言則彼等一生讀書立行亦屬虛僞爾錄此旨令前往之人帶去李光地處往返限六日張鵬翮處往返限二十日郭琇彭鵬處爾等可計程限日○諭鄂羅斯地方遙遠僻處西北海隅然甚誠敬噶爾丹窘迫求彼曾拒而不答曩者遣人分畫邊界卽獻尼布潮地以東爲界尼布潮等處原係布拉忒吳梁海諸部落之地彼皆林居以捕貂爲業人稱爲樹中人後鄂羅斯強盛遂併吞之已五六十年矣卽此允當軫念也○御史呂崑奏秋審罪案宜分兩議具奏上曰此事斷不可行若



分兩議誰肯附於議斬者惡人不除則法既不行善類何以得安  
朕凡遇難決之事必與諸大臣商酌行之卽如昨日刑部奏毆死  
伯父毆死叔父之人擬卽正法朕著問九卿等亦謂此等人必當  
處斬但其中或有他人毆死而歸罪於彼亦未可知故令詳議也  
彼等果係情實豈可寬宥此本著發還呂崑給事中御史各任言  
責各以聞見入奏甚是朕此發還非阻言路之意因於事不合故  
發還耳可將朕旨曉諭○以徐秉義孫岳頒俱爲禮部侍郎徐秉義由詹事孫岳領由祭酒遷王九齡爲內閣學士由左僉都御史遷○丙辰諭戶部國家  
要務莫如貴粟重農朕宵旰圖治念切民生惟期年穀順成積貯  
饒裕於以休養黎元咸登樂利今聞直隸各省雨澤以時秋成大  
熟當此豐收之時正當以饑饉爲念誠恐歲豐穀賤小民罔知愛  
惜粒米狼戾以致家無儲蓄一遇歲歉遂致仳離著該督撫嚴飭

地方有司曉諭民間樽節煩費加意積貯務使益藏有餘閭閻充裕以副朕重農敦本愛養元元至意○丁巳 上巡幸塞外啟鑾○以張霖爲雲南布政使原任福建布政使○是月免安徽泗州盱眙水災額賦

八月戊辰裁涼州鎮標守備一○辛未 上駐蹕齊老圖○癸酉教養敖漢蒙古黃茂等來請 聖安並將耕穫穀石數目摺奏命奏事主事存柱等傳諭曰此所穫之米不可不交人看守否則盡爲蒙古所盜矣著諭大學士馬齊至京卽派人前往更代所需人員亦不必多每旗止派一二章京足矣俟更代人到後爾等逐一交清方可回京並諭黃茂等此番年穀豐稔皆係爾等之福爾等回京亦有榮也旣而教養蒙古各部落人員相繼請安 上逐一詳問蒙古生計及耕穫穀石數目並雨水曾否均調等事○己卯

諭兵部將軍孫思克謀勇素裕居官甚優效力行間克奏膚功久  
鎮巖疆勤勞素著允稱良將其從前所革世職著給還以示優眷  
○己丑予故兵部侍郎嚴曾渠祭葬○工部議覆河道總督張鵬  
翮奏科臣張睿奏中河應開陶莊閘放水從仲莊閘出口建瓴之  
勢偪湍使南部議行令詳勘具奏臣率淮揚道王謙等詳視若將  
中河改由陶莊閘而行至董安國所挑引河引入黃河勢必遷移  
縣治又多繁費且糧艘難以進口不若仍舊至陳家莊渡河直進  
仲莊閘草壩毫無阻滯應如所請從之又議覆張鵬翮奏臣率河  
員親往沂河查看沂河水勢直衝盧口面寬湍急且係沙底不能  
開閘應於盧口兩旁隄岸殘缺之處概爲修補束水入徐塘口運  
河既可濟運又使民生得所應如所請從之

九月乙未工部等衙門奏高家堰工程關係緊要凡在河工大臣

理應和衷協同辦理使工程速竣今尙書范承勳等具奏王日藻等所遺工程應令河員常維楨等幫築而河道總督張鵬翮又稱常維楨等有賠修工程恐顧此失彼不惟工程兩誤且帑銀不無牽混且各疏題互異俱屬不合嗣後務須公同商酌具奏如仍前互異交該部察議得旨總河職任宜專此遣往督修高家堰范承勳等九臣俱著撤回其督修工程著交與總河張鵬翮餘依議○王寅原任河道總督王新命工部侍郎白碩色自永定河來奏事上問曰河工事若何王新命奏曰河水一股從冰窖村北流向西去一股從三聖口南流向西去一股從舊隄徑出柳汊近日三聖口冰窖村百姓正欲議立馬頭見有商船來往又奏隄工上曰朕不問爾所修之隄止問爾所釘之椿王新命奏曰椿已釘過三千丈尙有餘贖上曰既有餘贖可於河口密釘之○以曹鑑

倫爲內閣學士

由少詹事遷

○癸卯吏部議河南巡撫李國亮將衰庸

有病之盧氏縣知縣保舉行取及回奏不據實認罪乃摭虛詞掩飾應以溺職論革職得旨李國亮著以原品休致○乙巳諭大學等給事中穆和倫條奏服用奢侈本章爾等擬票申飭朕意言官專任耳目之職若因言而罪之誰復敢言但此本內言順治以來至康熙十年尙爲儉樸嗣後漸至奢侈等語殊屬錯謬朕知之甚悉自輔臣攝政十年以前時凡器用服食等物甚爲奢侈自朕聽政以來一應服食俱從節儉諸王大臣亦皆效法不用金銀器皿金鐙等物此時服用較從前十分之內已減九分矣馬齊奏曰十年前祭葬多焚化皮衣其風今已息上曰諸王大臣服用雖甚節儉筆帖式護軍庶人等服用未必不少有奢侈朕歲歲賞賚更給官馬而生計尙未充裕謂非奢侈之故乎朕閱載籍歷代以來

皆由樸而漸至於奢未有由奢而漸至於樸者然不可以不禁也  
今惟以大開言路爲要務況設立科道專爲求言所言當則行之  
不當但將原本發還如此則內外臣僚亦俱知儆戒矣朕聽政四  
十餘年言官有爲人而言者有受賄陳奏者有報私讐而顛倒是  
非者此等條奏朕無不知至於喪祭時恐其僭用朕屢經傳諭族  
長著不時查察今日久漸弛容或有之亦當禁止此本著不必申  
飭○丙午工部奏銷算雜項修理錢糧 上曰一月內雜項修理  
卽至銀三四萬兩殊覺浮多明季宮中一日用萬金有餘今朕交  
內務府總管凡一應所需之銀一月止五六百兩併合一應賞賜  
之物不過千金從前光祿寺一年所用銀兩亦甚浮多朕節減大  
半工部情弊甚多嗣後凡有修理之處將司官筆帖式俱奏請派  
出每月支用錢糧分晰詳細造冊具奏若三年內有塌壞者著賠

修如此則工程堅固而錢糧亦不至妄費矣○諭大學士等旗下大臣子弟當令爲侍衛執事勤勞效力今皆令入部院衙門大臣交相顧庇一應升遷出差全不論俸之淺深人之優劣擅徇情面選擇保奏其閒攬事恣行者亦有之此輩在部院衙門大臣等彼此相託不無掣肘見今寫本辦事坐臺馳驛者勞苦之處大臣子弟誰肯派遣況漢人見任三品以上堂官子弟不授科道之職若大臣子弟人材果優何處不可效力必在部院衙門方爲美耶今八旗滿洲漢軍除同族不論外其子孫兄弟叔伯兄弟之子在部院衙門爲司官筆帖式者著查明寫摺子呈覽朕擇其可畱者畱之可去者去之上三旗以侍衛執事選用餘著隨旗行走俟伊等父兄不在見任時再行補用部院衙門爾等可問九卿會同具奏○丁未大學士等奏遵旨以大臣子弟解退部院衙門酌量或任

侍衛或隨旗行走之處問九卿九卿云 聖諭極是但未知查何品以上大臣相應請旨 上曰著將八旗滿洲漢軍在京及外省文官三品以上武官二品以上大臣等子孫叔伯兄弟之子在部院之司官筆帖式並進士舉人概行查明具摺奏聞此內有曾經軍前效力及曾當苦差之處皆於名下開註○戊申諭工部尙書薩穆哈爾部之事弊端甚多修築河工隄岸錢糧及給發諸工銀兩爾部官員筆帖式侵蝕一半入己爾在部年久諸弊得諉爲不知乎爾當自爲身計○己酉刑部以龍巖知縣趙光榮誣良爲盜一案兩議具奏一議前雖錯審後審出實情應免議一議誣良爲盜雖審出實情已經致死人命仍應革職 上諭大學士等將覆審得情之官仍因初審錯誤議處則人皆懼罪不肯露其實情朕意欲定一例凡部駁應審事件不交原問官審理儻仍令原問官



審理彼必固執前議致令銜冤者多矣著九卿詹事科道一併詳  
議具奏尋議嗣後部內駁回覆審事件應另委官審理將原審不  
明之官另行定例處分從之○以徐潮爲河南巡撫由刑部左侍郎遷○  
工部尙書薩穆哈以老乞休得旨薩穆哈在部辦事四十餘年事  
務豈有不知弊端豈有不悉乃歷年碌碌河工積弊至於敝壞各  
項工程錢糧皆致虛糜今奉嚴旨遂欲卸責離任虛僞巧詐已極  
薩穆哈著革職仍令將工部事務弊端明白查察若仍前執謬將  
弊端不行舉出決不寬宥○庚戌御史劉珩奏直隸永平眞定等  
處田地應令巡撫李光地視其近河之處引水入田耕種上諭  
大學士等水田之地朕所洞悉已交李光地見令引水耕種水利  
一興田苗不憂旱潦歲必有秋其利無窮但不可太驟耳今若竟  
定一例諸處剋期齊舉該部覆行催查則事必至於難行矣亦惟

興作之後百姓知其有益自然鼓勵各相效法於是因地制宜設法行之事必有成觀今此處亦不必開池惟如甯夏水田開濬溝渠潦則撤田中之水自渠出之旱則放渠之水入於田中災荒總可無虞矣策妄阿喇布坦處盡是水田所以全無水旱之災惟或一年穀米變蚊而飛或穀熟時穗內全然成血此則彼處之災也此事太僕寺喇錫侍郎常綏知之朕亦見之書籍又盛京有一種馬札名曰沔蟲更甚於蝗蟲此處蝗蟲食苗後尙飛去盛京田內一有沔蟲必將田禾之穗連根及葉齧食無遺方止此皆朕所親見非得之傳聞也○封下嫁順安顏之公主爲和碩溫憲公主授順安顏爲和碩額駙○辛亥 上御經筵○癸丑河道總督張鵬翮奏前河臣于成龍查勘於四堡挖引河由胡家溝出黃河臣相度形勢胡家溝迤東地勢頗高恐引水不暢且地係沙土難以開

開查勘挑挖引河之處在於涵洞口處至老隄頭迤東出黃河地勢低窪打量水平湖水比黃水高七寸六分自涵洞起至九龍廟止見有舊河一道長一千二十七丈九尺河身深窪不必挑浚自舊河起至黃河邊止應挑引河長三千八百二十三丈五尺估挑面寬十丈底寬十丈深八九尺一丈不等應於黃河縷隄之處建造石閘於臨河之處建築草壩隨時啟閉以防黃水倒灌再於歸仁隄五堡建石閘若黃水倒灌則閉黃河縷隄之閘將此五堡之閘開放以洩湖水不至漲裂隄身於引河南北兩岸築束水隄並補築九龍廟舊隄決口七處砌石工使水不至旁溢如此引河修成則洩歸仁隄之水出黃河可以衝刷河身可以保護民間廬舍不至淹漫得旨歸仁隄修築事宜屢經面諭于成龍最爲緊要乃于成龍性偏未能詳看遷延時日以至於今觀張鵬翮所奏甚爲

合理此事所關最要著九卿詹事科道會同速行詳議具奏及今年黃河水小之時興工毋誤尋九卿等議如所奏不拘動支何項錢糧作速興工一面將需用錢糧細數確估具奏命依議速行○丙辰轉喻成龍爲刑部左侍郎以下永譽爲刑部右侍郎原任福建巡撫○丁巳以哈雅爾圖爲理藩院尙書由左都御史遷○是月免直隸永清江南高郵浙江西安等十七州縣被災額賦

冬十月辛酉先是 上以 皇太后六秩聖壽命 皇四子整備

進獻禮物恭進佛三尊 御製萬壽無疆賦圍屏一架 御製萬

壽如意太平花一枝 御製龜鶴遐齡花一對珊瑚進貢一千四

百四十分自鳴鐘一架壽山石羣仙拱壽一堂千秋洋鏡一架百

花洋鏡一架東珠珊瑚金珀禦風石等念珠一九皮裘一九羽段

一九哆囉呢一九璧機段一九沈香一九白檀一九降香一九芸

香一九通天犀珍珠漢玉瑪瑙雕漆官窰等古玩九九宋元明畫冊卷九九攢香九九大號手帕九九小號手帕九九金九九銀九九段九九連鞍馬六匹並令膳房數米一萬粒作萬國玉粒飯及肴饌果品等物進獻○乙丑 上御紫光閣率諸王子及宗室侍衛等射 上發五矢皆中的試中式武舉等步射技勇親簡善射武舉馬會伯等三十餘人復令步射擇其尤者八人 上還宮御西暖閣讀卷官馬齊等以試卷呈覽 上曰朕親試武舉已經十二三次矣從無及此科者不但步騎射俱善人材亦優此內朕又特簡八人步騎射俱善頗無優劣惟視其文爲次第耳隨命諸臣拆卷定其次第○以安布祿爲左都御史由理藩院左侍郎遷○丙寅賜馬會伯等一百八人武進士及第出身有差○諭大學士等九卿諸臣但以朕可者可之否者否之無一人有直言者伊等皆係讀書

之人豈不知忠爲事君之大義頃者朕以九卿不足信將行取知縣及科場事宜遣問張鵬翮郭琇李光地彭鵬九卿獨不抱愧乎四人居官之善朕何以知之蓋以彭鵬任三河知縣朕謁陵往返稔聞其賢張鵬翮曾任兗州知府居官甚善郭琇曾任吳江知縣朕南巡時百姓俱稱其賢李光地爲學院時官聲最優凡居官賢否惟輿論不爽果其賢也問之於民民必極口頌之如其不賢問之於民民必含糊應之官之賢否於此立辨矣若張鵬翮等偶有他過朕尙可曲宥如九卿不肯直言朕必重懲一二人彼時勿謂朕不寬也朝廷設九卿所司何事其以朕旨曉諭之○河道總督張鵬翮奏武家墩起至小黃莊加砌石工舊椿石敝朽勢必拆卸方可堅固經久今於舊殘石工之上疊柴壓土以爲越壩於內建砌則省費而工速此工除撥銀四十萬兩外內有不足銀一十

八萬六千二百四十八兩零應請飭該部速行撥給乘此冬令水涸修築速完勿致遲誤諭大學士等張鵬翮每事奏請詳明實能宣力若張鵬翮等朕不之信將誰信耶伊若果爲利計歷任知府運使巡撫皆可得利既不取於彼豈肯於河工錢糧侵蝕肥己乎其操守廉潔誠不可及惟有時偏執己見然朕亦卽時戒飭並不寬假也又奏臣率河員查勘新中河必須全身挑挖兩岸子隄全身幫築所需錢糧頗繁而河頭灣曲糧艘行走不便且三義壩以上三十一里零河身狹淺遇湖水大漲恐不能容納舊中河自三義壩以下至仲莊閘二十五里零河身甚深南岸湖水散漫難保子隄且距黃河甚近今議在三義壩將舊中河築攔河隄一道改入新中河則舊中河之上段與新中河之下段合爲一河糧艘可以通行無滯得旨前于成龍奏稱將中河改移朕屢經諭其恐有

未便今張鵬翮所議中河事宜甚當著照所奏行○以郎廷極爲

福建按察使

由山東登萊道遷

○丁卯諭大學士等臣下之賢否朕處深

宮何由得知緣朕不時巡行凡經歷之地必咨詢百姓以是知之  
今張鵬翮居官之優豈朕目擊其行事亦不過得之傳聞耳因此  
朕欲開風聞言事之例科道官以風聞奏參卽行察該督撫賢者  
畱之不賢者去之如此則貪暴斂迹循良競勸於民大有裨益嗣  
後各省督撫將軍提鎮以下教官典史千把總以上官吏賢否若  
有關繫民生者許科道官以風聞入奏儻懷私怨互相朋比受屬  
託者國法自在著傳諭滿漢掌印與不掌印科道官員知之○己  
巳河南巡撫徐潮陛辭 上諭聞河南火耗甚重爾去當嚴行禁  
止又聞彼處虧空甚多爾去當如何籌畫如何令無虧空河南連  
歲有秋未知積貯如何爾亦當細心查覈徐潮奏曰臣聞河南有



幾州縣火耗最重此外尙有私派臣當嚴行禁革又州縣虧空錢糧臣到河南惟有潔己率屬寬養其力使彼逐漸自補再不改悔定行奏參 上曰今天下雖太平然武備不可有懈爾有撫標兵卒爾從翰林出身武事恐未必畱心宜嚴飭將弁不時操練爾撫標操練精強則兩總兵官有不凜然操練者乎總之爾去亦如張鵬翮郭琇李光地彭鵬所行則不但爲當今名臣亦取重於後世矣○給事中慕琛奏安東縣楊家馬頭一案經前任河臣于成龍奏報於康熙三十八年六月內漫漫三十餘丈不卽勘修延至一載有餘而所謂三十丈者遂變爲一千二百丈之多請嚴定處分又馬家港漫缺據河臣張鵬翮題奏本年四月合龍旋即於六月初旬衝開承修之馮大奇等始則草塞完工隨修隨壞旣壞復抗延不卽辦料請敕將馮大奇等議處抑臣更有請者近見河臣帑

金糜費一疏止參賠修未完而並未及承追之官嗣後當年衝決者勒承修官速賠不准請帑如限內不完將承催不力之官一併列參照例處分又各工完日該總督卽委道員踏看出具甘結儻隨修隨壞及三年內衝決者請將出結之官照徇庇例重處得旨著張鵬翮明白回奏○以滿篤爲理藩院右侍郎由內閣學士遷○兵部議覆四川陝西總督禮部尙書席爾達奏臣等遵旨將化林營移駐打箭鑪據該營詳稱官兵渡瀘河之西不意鑪番甚爲狂悖將修路之官兵打死拆毀偏橋阻截官兵又探得在五鴉等處抽兵有欲搶奪沿河一帶之信隨咨商四川提督唐希順暫爲巡防以取進止查鑪番阻踞應行文商南多爾濟副都統阿南達令其轉行第巴將殺死兵丁拆毀偏橋之番蠻速行查拏解送並令提督唐希順親領兵丁巡查固守三渡口勿致截斷我兵後尾如不將

罪犯解送仍前妄行及侵犯沿河地方卽行奏聞俟命下進剿得旨依議速行○癸酉 上巡視永定河啟鑒○甲戌自鵝房村徧視永定河隄 駕至麻格莊河灣諭分司敦拜曰此處宜從上流下挑水埽用以盪刷淤墊 上閱新修河隄諭敦拜曰此坍塌之隄宜速完工又閱新莊求賢莊石佛寺等處河灣諭敦拜曰此處當下挑水埽又閱雅地里河灣諭敦拜曰觀此岸地勢崇高斷乎無害南岸地卑不可不加意堅築○乙亥 上自葛家屯徧視永定河隄閱至北閣驛河灣諭分司敦拜曰此處宜築挑水埽隨至清涼寺閱衝決隄口召原任河道總督王新命工部侍郎白碩色巡撫李光地分司朝琦等諭曰爾等可會議開濬新河放水其清涼寺缺口不必塞隨行幸雙營見視隄工畢回駐蹕葛家塢命吳達善等於李光地王新命白碩色前傳諭赫碩滋曰自葛家塢至

清涼寺一帶朕閱視尙皆加意修築此外所築隄下椿俱淺又截去長者其束輦極鬆復亂拋置之此隄仍著原築之人修築卽交與赫碩滋親身看守晝夜巡察儻椿木衝壞或別有他故卽速行奏聞不然卽梟示爾於隄上朕巡視南河時指令下椿修築之處竟不行修築避往他處其時卽應誅之今更以此隄委爾慎之○諭大學士馬齊分司敦拜護守河隄甚善在部院年久人亦老成著額外補授內閣學士仍管理分司事○丙子分司敦拜齊蘇勒奏曰 皇上自去歲指授一切工程俱有功效隄岸克保無虞但南岸尤爲緊要伏乞 皇上指示 上曰兩岸須釘排椿使水永不外溢則爾防守甚易矣又諭自郭家務以上南岸舊隄甚薄著交與原任河南巡撫李國亮務將排椿作速於隄外深釘此隄卑狹處亦交與彼加寬增高酌量補築隄內田中浮土可剗取用之

隄邊柳樹不可輕伐所塞之口令先動工其地勢高阜處水既不漫溢可酌量節減不必修築所用排椿葦草向原任總河王新命取之上自葛家塢徧閱永定河南岸查驗椿木俱短小不如式命近御侍衛海青傳諭原任河道總督王新命工部侍郎白碩色等曰自委爾等河工以來並未陳奏一事卽椿木丈尺亦未如式深下爾等果實心修築自正月至今親身監修卽每日里許亦修築竣工矣密邇京師相去僅一日之程其能欺朕耶若再三年無成朕豈肯輕恕必將誅之又諭巡撫李光地曰永定河工程及物料爾等不時稽查其椿木合式者收貯於葛家塢之東蘆葦務收貯於乾燥之地毋致朽爛其看守不謹者卽令賠償其河工未完處仍交王新命等修築令保三年爾所查工程物料需用錢糧奏銷時毋致浮冒河工效力人員內諸色濶雜爾亦務確查奏參○

丁丑 上駐蹕南苑○以席哈納爲內閣學士

由太常寺卿遷

○戊寅

上還宮○己卯諭大學士等今年內升科道官仍管原任事外轉又停科道官暫時無缺候補之人不能卽補今歲行取以科道用者著補額外御史俾隨九卿議事則伊等苟有一得可以陳奏爾等將此傳諭吏部○庚辰兵部議覆湖廣總督郭琇等奏鎮筸紅苗違化參將朱紱已經剿撫事竣其善後事宜應分設汛守建立哨臺煙墩並嚴禁奸民私販火藥軍械娶苗人婦女等事每月三日聽苗民互市限時集散仰請敕旨勒石應如所奏永爲遵守從之○辛巳張勦原品休致調張志棟爲浙江巡撫

由福建調

○贈振武將軍甘肅提督孫思克太子太保予祭葬加祭二次謚襄武○壬午諭大學士等吏部尙書庫勒納左侍郎阿爾拜居官不職俱著解任於佐領處行走○工部議邵伯更樓隄決致壞漕艘應將協

理河務府尹徐廷璽降三級畱任得旨徐廷璽著降三級調用○  
癸未兵部尙書范承勳等至自河工入奏 上問曰陶莊引河挑  
水壩工程俱完否河溜何如范承勳奏曰河工已竣今秋水小故  
未放水其挑水壩七月中旬已告竣河溜已漸循北岸而流 上  
曰此後淮水能出否范承勳奏曰淮水長至五六尺可出引河之  
口 上又問曰淮水瀦積過高可無虞否范承勳奏曰高家堰加  
高之隄高出水面一丈二三尺不等淮水縱高尙足捍禦布雅努  
奏曰臣等今所築之隄闊八尺高二丈有餘沿湖皆用輦束加椿  
似可無虞王揆奏曰將來石工告竣可以禦水卽見築之隄亦屬  
高厚總之築壩幫隄爲今冬急務 上曰洪澤湖波浪石隄且被  
衝壞萬一黃淮交漲爲之柰何喻成龍奏曰 聖慮極當幸已發  
帑金將隄加幫高厚今張鵬翮估計建立滾水壩宣洩水勢且翟

家壩一帶可令洩水以殺其汎漲之勢 上曰爾等所奏雖如此

恐未可易視也○丙戌召原任刑部員外郎趙申喬來京○丁亥

調席爾達爲吏部尙書仍署四川陝西總督事由禮部調轉特默德爲

吏部左侍郎調傅繼祖爲吏部右侍郎由盛京兵部侍郎調○以梅錫爲福

建巡撫由左副都御史遷○是月免江南清河浙江江山等九縣被災額

賦有差

十一月庚寅理藩院奏鄂爾齊圖哈灘巴圖爾自青海移至甯夏

議給人口糗糧牛馬芻豆 上諭大學士等著照所議行數年以

來宇內昇平惟西陲陝南甘肅常有差遺之事出邊人員地方官

皆協助供應陝西甘肅官吏駐站甚爲艱苦著差戶部右侍郎溫

達前往將沿途驛站查視若有敝壞者會同地方官增添撥給其

供應出邊人員等物議定額數以聞○辛卯修理永定河河工員



外郎赫碩滋奏參原任河道總督王新命工部侍郎白碩色河工草率及條奏應修等處 上諭大學士等赫碩滋人甚輕浮永定河應修事宜朕總責成伊等共理今赫碩滋因事難成又見朕有嚴旨遂妄參奏至伊條奏有云見今地面雖凍而水中地尚未凍應及時修築等語尤爲悖謬今時令漸寒若待行文河上鳩聚夫役則時已嚴寒地皆堅凍何以興工爾等可傳王新命等至內閣以此二事令對質○王辰大學士伊桑阿等奏曰臣等遵旨傳集王新命白碩色與赫碩滋對質王新命云今天氣正寒將挑濬之土置岸卽凍若行堆積又不可用歲內斷難興工明春雨水前必當趨修告竣赫碩滋時向臣等建論是實如彼言果當臣等卽照伊行之否則亦相商酌而行其云夫役小錢及用爛麻亦實臣等皆已驗過更換 上曰朕曾命赫碩滋確查具奏故赫碩滋將伊

等奏參彼向在河南意此河可照黃河一例興工殊不知南方地

暖尚可修築此河如何可比今已漸寒興工得乎然王新命赫碩

滋等皆同事之人此河明歲告竣則已否則朕自有處分○以額

倫特爲盛京兵部侍郎由左副都御史遷○甲午調喻成龍爲工部左侍

郎管右侍郎事轉卞永譽爲刑部左侍郎調吳涵爲刑部右侍郎

由工右調○丙申 上幸南苑行圍○以札賴爲左副都御史原任○戊

戌 上還宮○辛丑 上謁 陵啟鑾○以勵杜訥爲左副都御

史由宗人府丞遷○大學士馬齊遵旨會同都察院議奏禮部尙書王

澤宏侍郎覺羅三寶等將索倫總管覺羅阿圖應在館喂養之馬

匹違例給與草料在阿圖家喂養又挾私奏參監督薩拉倡壽應

將尙書王澤宏侍郎覺羅三寶王封燦李錄子俱各降二級調用

查王澤宏覺羅三寶王封燦各有加級紀錄應抵銷得旨王澤宏

著以原品休致三寶著革職李錄予著降二級從寬免調用餘如  
議○乙巳 上謁 暫安奉殿 孝陵至 仁孝皇后 孝昭皇

后 孝懿皇后陵奠酒○賑巴林旗○丙午以韓莛爲禮部尙書

由吏部右侍郎遷

凱音布爲禮部左侍郎

由副都統遷

○九卿等議覆湖廣總

督郭琇遵旨詳議科場事宜四疏嗣後直隸各省鄉試在京三品  
以上及大小京堂翰林科道吏禮二部司官在外督撫提鎮及藩  
臬等官子弟俱編入官字號另入號房考試各照定額每十卷民  
卷取中九卷官卷取中一卷不必分經其副榜亦照此算取若各  
省鄉試官員子弟或止數人者不必另編官字號雲南貴州四川  
廣西四省在監鄉試亦編入南監內俱一體分別編官字號照額  
取中會試滿合字號南北字號亦編官字號每二十卷取一卷雲  
南等四省中額仍照見例行不另編官字號各項監生有願在監

入場者俱由國子監錄取責令祭酒等力行考課之法考課不缺者准其入場照例分別南北官民卷其願在本地鄉試者與生員一體分別官民卷取中童生內有將經書小學真能精熟及能成誦三經五經者該學臣酌量優敘論題將性理中太極圖說通書西銘正蒙等書一併命題從之○九卿等議覆河道總督張鵬翮奏臣於十月十九日親往高家堰六壩催工見水勢驟長三滾水壩尙未修成恐西風鼓浪無處宣洩公議於翟家壩原有天然滾水壩用埽裹住兩頭平槽之水蓄以濟運溢槽之水聽其滾出塘槽河入白馬河若伏秋水長再於蔣家壩盡頭處原有之清水溝河以及涵洞酌量開放若水小仍然閉塞再查六壩口寬二百八十丈今清口引河僅寬三十餘丈不足以暢洩全湖之水應再開寬闊使水暢流敵黃至於運河伏秋水漲應由涇河澗河洩出射

陽湖入於海此二河見在挑竣應將涇澗二閘修補以資啟閉均應如所請從之○己酉工部議准河道總督張鵬翮奏嵇家閘未堵恐來年重運經由有掣溜稽遲之患必須實閉另於閘南昭關廟地方改建滾水石壩一座水大則啟以宣洩水小則蓄以利運從之○辛亥 上巡幸邊外啟鑾○癸丑轉徐秉義爲吏部右侍郎由禮部轉○命卓異官如行取例引見○戊午署四川陝西總督席爾達奏准四川提臣唐希順咨稱烹壩已被鑪蠻侵占輒敢渡河不但侵犯擦道意在斷我官兵歸路又准四川撫臣貝和諾咨據化林營參將李麟等詳稱將來取鑪非三路進兵不可三路齊進之外更宜另撥官兵一路由甯番一路由魚通一路由甯越則渠魁亦可擒獻臣思鑪蠻如此狂悖提臣唐希順已經親至化林營汛抽調各鎮營官兵應否直前剿逐擒拏渠魁密奏請旨得旨著

將荊州滿洲兵二千發往四川將軍莽奕祿年老著鎮守地方副都統二員領兵前去再著理藩院侍郎滿丕自京馳驛前往統領與提督唐希順商酌行事這所發之兵每名賞銀二十兩整理器械到成都之日其口糧酌量路程支給勿致遲誤其糧餉著巡撫貝和諾料理見應作何行事之處著唐希順相機而行勿致失機十二月己未朔河道總督張鵬翮奏臣懍遵 聖授治河方畧次第舉行先疏海口水有歸路今黃水不出岸矣繼挑芒稻河引湖水入江高郵寶應一帶水由地中行再闢清口開張福口裴家場等引河淮水有去路矣加修高家堰堵塞六壩偪清水復歸故道引張福口等河會入裴家引河開放清水流入運河又將湖頭加濬深闊以迎洪澤湖溜將張福口引水入裴家場再挑寬深水大勢旺直敵黃水暢流入黃河矣運河之中純係清水已無黃水灌

入臣自下河回至清口見水大半入黃少半入運一水兩分若有神助官民快覩淮黃交會歡聲如雷皆我皇上宵旰憂勤精誠上格天心河神效靈之所致也下所司知之○庚申吏部議覆給事中慕琛奏參雲南布政使張霖出身鹽商官方有玷輿論不孚應將張霖革職從之○甲子河道總督張鵬翮遵旨回奏給事中慕琛各款臣查安東縣楊家馬頭經河臣于成龍奏明俟時家馬頭工程合龍即可補築此從相機修治慎重錢糧起見並非敢於坐視也馬家港漫缺臣奏明發帑委員興修並將馮大奇等奏參部議革職此係遵舊例而行並非今日始也至河工賠修俱係從前舊案甚屬繁多若將承追之官勘行定例處分則新任道員不能久任恐致廢弛河務此斷斷不可行者也又奏稱工程完日委道員踏勘出結儻衝決照徇庇例重處查修築黃運兩河限內

衝決無論出結與否俱有處分今若將出結者處分則不出結者反得倖免應仍照定例行且自臣履任以來銳意節省皆歸實用而科臣反謂帑金糜費日甚臣懷遵 皇上指授方畧疏通海口黃淮交會萬民歡頌功成而科臣獨謂河工貽誤日多臣不知其何心也下所司知之○乙丑 上謁 暫安奉殿 孝陵遣 皇子詣 仁孝皇后 孝昭皇后 孝懿皇后陵奠酒○丁卯河道總督張鵬翮奏淮黃交會宜思善後之計見在諸引河之水勢聚而力强故足以敵黃而直出運口但大半出黃少半濟運一水兩分伏秋黃長恐清水之力稍微應於張福口裴家場二引河空地中間迎湖大溜之處挑引河一道寬二十丈底深一丈會入一河俾清水之勢常強而禦黃有力將爛泥淺會入三汊河從七里河出文華寺運河專以濟運下部議行○戊辰 上還宮○庚午命



行取候補主事梁浩之等四十三員卽以五部主事額外補授○  
刑部等衙門會奏署四川陝西總督席爾達覆審原任巡撫于養  
志提督岳昇龍互相揭參一案奏稱于養志將岳昇龍咨移任私  
刪改不據實具奏以致營官踞鎰狂悖侵占河東芳泥等處應擬  
斬岳昇龍仍照前議革職查于養志已發往軍前效力俟回日監  
候餘應如所奏得旨依議前所遣兩侍郎並未審明席爾達方行  
審結何故不問其罪三部諸臣未免徇情若不問擬嗣後審事諸  
臣俱任意橫行三部大臣著行申飭尋議侍郎羅察布泰應各降  
三級畱任得旨羅察布泰著照所降之級隨旗行走○壬申宗人  
府奏已革貝勒諾尼以從前擬罪情屈控告得旨諾尼無罪著仍  
授爲多羅貝勒安親王岳樂從前管理宗人府污鱉諾尼枉擬治  
罪著交宗人府議處○癸酉調蕭永藻爲廣西巡撫彭鵬爲廣東

巡撫○乙亥冊封佟氏爲 貴妃瓜爾佳氏爲 和嬪衛氏爲

良嬪○丙子禮部左侍郎凱音布內閣學士邵穆布差往廣東察

審黎人王鎮邦侵犯及起釁文武官員請訓 上諭爾等至彼鞫

審時如官員有苛酷處卽行拏問其內有升調者亦行調審儻總

督有應取供之處亦行勘問今彭鵬調補廣東巡撫爾等會同總

督石琳巡撫彭鵬赴瓊州鞫審凱音布邵穆布奏曰總督巡撫提

督等已經差人往招黎首王鎮邦若出降則已如不降臣等請但

審見在人犯 上曰於爾等未到之先想已出降矣如果不降爾

等卽審見在人犯趁暑前速還○以敦拜爲工部右侍郎

由內閣  
侍讀學

士○署四川陝西總督席爾達奏鑪蠻狂悖屢率醜類攻突我官

兵營盤署四川提督中軍參將馬爾值右營遊擊張自成相機奮

勇擊敗蠻兵乘勝追逐復得河東末威處壩二處下兵部知之○

丁丑直隸巡撫李光地奏原任河道總督王新命等諸事俱不效力惟徇情面無益河工部議王新命等應撤回將河工錢糧交李光地上諭大學士等李光地奏稱王新命赫碩滋宜撤回京最為允當今河上事務李光地一身任之王新命在彼奚為將此輩撤回京中拘禁候河工告竣之日一併議奏○諭大學士等張鵬翮奏修築下河事宜深為得當誠如此修築錢糧節省底績亦易于成龍為修下河會屢疏具奏未得其宜朕俱不允此非可徇情面之事朕於奏章必是非昭然毫無可疑者方允舉行雖日後有失朕直受之斷不委之他人此等事諒記注官必備載之于成龍在日最有聲勢交與亦廣卽爾諸臣誰與抗衡凡于成龍所奏於理不符者朕皆窮詰不行今張鵬翮所奏事俱合理朕皆照所請行朕並非偏向張鵬翮也初張鵬翮會奏請改流白馬湖事毫無

裨益朕不允行今所奏事實爲有益因皆允之朕觀河工之弗成者一應弊端起於工部凡河工錢糧皆取之該部每事行賄貪圖肥己以致工程總無成效張鵬翮亦會面奏云武弁藉空糧文官賴火耗河工官員別無所獲惟侵漁河工錢糧所以河務無成今張鵬翮所用錢糧俱非部支並無掣肘自到任以來一文不肥己正項河銀俱實用於河工此河事所以得成效也○給事中湯右曾奏臣辦事垣中閱視揭帖見兩廣總督石琳奏參雷瓊道成泰慎瓊州府同知何斌瓊州右營遊擊詹伯亨等遣人進黎擾害致生黎王鎮邦等攻犯寶停等營似此貪婪不法之員總督石琳巡撫蕭永藻提督殷化行何以平時毫無覺察恣其貪毒事起於三十八年十二月內並不具奏迨王鎮邦不就招撫勢須用兵然後奏報徇庇容奸希圖欺隱若不嚴加處分恐後無所儆戒必致貽

誤地方得旨所參事情著石琳蕭永藻殷化行各明白回奏○戊寅河道總督張鵬翮奏黃河下流最窄之處無如安東便益門以及對岸韓家莊臣率道廳等官探量兩岸相距僅六十餘丈又兼時家馬頭至伊家莊河身過曲對岸沙洲偏溜直衝南岸韓家莊而韓家莊以下又突出沙觥偏溜直射北岸便益門且隄高於城勢甚危險應將兩處沙洲於中開挑引河二道使黃流直下以固城池以保險工從之又奏臣查勘下河見水勢漸消惟興化積水一時不能全退較泰州鹽城水患尤甚臣相度形勢博採輿論高郵寶應山陽鹽城一帶之水由射陽湖之蝦鬚二溝入廟灣以達於海今蝦鬚二溝因童營漫溢淤爲平地雖有戛梁河出水但河身淺狹不足宣洩是以泛濫今宜將蝦鬚二溝淤塞之處約計四十餘里挑挖口寬十丈深九尺一丈不等引水入朦朧河以達於

海鮑家莊至白駒口八十餘里地高水壅宜挑口寬八丈深六七尺不等引水由白駒場入海撈魚港淤塞八十餘里應挑口寬八丈深六七尺不等引水入海老河口一帶淤淺三里餘應挑口寬十丈深六七尺不等引水入河滔子河三十二里淤塞不通應開口寬八丈深六七尺不等引水由苦水洋入海如此則水有去路而積水可以漸消矣從之○己卯 上幸南苑行圍○兵部奏先是同馬承廕在柳州復叛之黃明署廣西巡撫麻勒吉奏稱已死乃於康熙三十七年復謀叛在湖廣地方拏獲黃明供認逃匿十有餘年則麻勒吉捏報不合雖已身故應追革官職從之○廣東廣西總督石琳奏黎首王鎮邦蠢動攻營不卽出降臣照會鎮臣唐光堯統兵前去始於十一月初一日親赴投誠下所司知之○壬午宗人府議已故安親王岳樂管理宗人府理宜從公審事乃

聽信畢喇什之妻縣主之言徇情將貝勒諾尼母子枉法擬罪殊屬不合應將岳樂追革親王岳樂之子安郡王馬爾渾僖郡王岳希固山貝子吳爾占輔國將軍副都統塞布禮孫奉國將軍色痕圖等盡革爵職爲閒散宗室得旨岳樂著追降親王爲郡王馬爾渾著從寬免革郡王岳希革去郡王吳爾占革去貝子俱授爲鎮國公其塞布禮之輔國將軍副都統色痕圖之奉國將軍悉從寬免革○甲申 上還宮○是月免直隸高陽江南徐州浙江金華陝西南鄭等二十九州縣衛被災額賦有差○是歲朝鮮來貢○人丁戶口二千四十一萬九百六十三田地山蕩畦地五百九十八萬六千九百八十五頃五十四畝有奇徵銀二千七百三十九萬五百六十八兩有奇米豆麥六百九十六萬八千五百六十九石有奇草二百八萬一千六百七十七束茶十五萬七千四百五

十五引行鹽四百三十一萬九千四百八十三引徵課銀二百六十九萬六百九十五兩有奇鑄錢二萬三千八百六萬五千八百有奇



東華錄

康熙六十七

臣王先謙敬編

臣周淪蕃恭校

康熙四十年辛巳春正月己酉以巢可托爲盛京刑部侍郎由內閣學士遷

○辛亥以辛保爲左副都御史由右庶子遷○甲寅解白碩色侍郎

任專理永定河工轉敦拜爲工部左侍郎以舒輅爲工部右侍郎

由內閣學士遷○努赫緣事革職以席哈納爲禮部侍郎由內閣學士遷○鑲白

旗漢軍副都統興永朝以病乞休得旨興永朝前任督撫並無裨

益兵民之事乃稱硜硜自守等語不合著解退副都統○禮部議

覆河道總督張鵬翮奏見今海口疏通黃淮二水交會濟運神速

皆河伯效靈所致請加賜河神封號應如所請得旨著封爲顯佑

通濟昭靈效順金龍四大王○乙卯諭大學士等張鵬翮任浙江

巡撫七載歷年錢糧俱照數清完並無虧欠今浙江錢糧甚無頭緒故先將巡撫張劬更換今亦欲易其藩司頃召來原任刑部員外郎趙申喬人甚敬慎委以錢糧斷無苟且著補授浙江布政使

○諭大學士等各省錢糧前曾以次蠲免過二年朕今欲蠲免江南明歲錢糧江南係大省錢糧繁多爾等會同戶部定議將各項應蠲錢糧逐一查明具奏今年十月卽頒上諭則江南全省之民庶可普霑實惠也○以辛保希福納傅紳俱爲內閣學士辛保由御史希福納由大理寺卿傅紳由翰林院侍讀學士遷

○戊午青海厄魯特台吉戴青和碩齊察罕丹津率屬歸附封多羅貝勒○是月免江南宿州衛上年水災額賦有差

二月己未朔 上巡幸畿甸啟鑾○以岳蘭爲左副都御史由郎中遷

○給事中馬士芳奏參山東省大計巡撫王國昌舉薦歷城縣知

縣管承寵係其私人又徇庇溺職之長清縣知縣崔錫榮不行參奏湖廣省大計巡撫年遐齡徇庇湖北布政使任風厚老病不行參奏得旨著王國昌年遐齡各行明白回奏任風厚可著來京引見○辛酉 上閱視永定河至清涼寺決口諭直隸巡撫李光地曰此河今歲務必完工爾等可勉力爲之○乙丑督師侍郎滿丕四川提督唐希順奏報康熙三十九年十二月二十日臣等分兵三路攻打箭鑪殺蠻兵五千餘人斬磨西營官喋吧昌側集烈及大岡營官籠送等得旨嘉獎下部議敘○丁卯河道總督張鵬翮奏臣按南河志清口至淮安建有五閘遞相啟閉以防黃河之淤又慮水發湍急難於啟閉則築壩以遏之每歲糧艘過盡卽於閘外築壩以遏橫流一應船隻俱暫行盤壩則是伏秋水發黃水倒灌自古已然故建閘築壩以防淤墊之患今運河初濬俟清水衝

刷使深河底尺寸既定方可建閘茲清水雖已出黃轉盼桃伏秋  
汛繼至節宣之道豫防之法不可不急爲籌也今於張福口裴家  
場中間開大引河一道併力敵黃但黃水會合眾流來自萬里頻  
年河身墊高勢大而力强淮水止發源桐柏迄今方出清口一半  
敵黃又一半濟運終慮力分而勢弱故蓄高家堰之水以助其勢  
幸而黃水不大發尙足以敵之若遇黃水大發在糧船正行之際  
將裴家場引河口門暫閉引清水由三汊河至文華寺入運河以  
濟漕運儻運河水大山陽一帶由涇澗二河洩水寶應一帶由子  
嬰溝洩水俱歸射陽湖入海高郵一帶仍由城南柏家墩二大壩  
洩水江都一帶由人字河鳳凰橋等河洩水入江若遇黃淮並漲  
清水由翟家壩天然滾水壩洩水黃水由王家營減水壩洩入鹽  
河至平旺河入海若糧艘過完黃水大發則閉攔黃壩使不得倒

灌且可以刷深黃河若黃水不大發將運河頭壩堵塞令清水全入黃河以資衝刷之功官民船隻照例盤壩俟回空糧船到日方啟止留三汊河清水仍由文華寺入運河卽古人設天妃閘於糧船過後閉閘築壩之意也得旨所奏已得河工祕要著九卿詹事科道會同速議具奏○庚午工部議覆給事中陳詵條奏自天妃閘至淮安共有五閘必復天妃閘然後淮水可出又請新舊中河應多建閘座重運來時節次啟閉重運過後勿令常開遵旨行文河道總督張鵬翮議奏今張鵬翮回奏臣查五閘之中惟當酌復天妃閘以防黃水內灌龍王寶應二閘拆修下板蓄水濟運又中河熬壩啟壩需費頗多不若於河頭尾各建石閘一座以時啟閉又於新中河孫家集以上修石閘一座如遇大水洩入鹽河應如所請從之○癸酉諭直隸巡撫李光地朕歷年省耕畿甸咨詢民

隱屢行蠲賑近見霸州大城文安地居窪下被水最甚雖遇豐年民猶艱食其三州縣累年積逋及本年應徵地丁正項應蠲米穀錢糧爾卽察明豁免務使各處窮民咸霑實惠○以甘國基爲河南按察使由福建巡海道遷○甲戌 上閱子牙河○丙子 上閱柳岔

口登新築隄諭直隸巡撫李光地等永定河每年當水涸之時河道旣枯必至淤平此甚難治朕思得一善策儻得引入清水以衝刷濁水之河底則水自深矣朕回鑾之時另頒諭旨○丁丑先是直隸巡撫李光地奏參王新命等修河錢糧並無著落 上命內閣學士法良吏部侍郎徐秉義會同察覈至是法良等覆奏察勘永定河挑挖新河工程錢糧不清王新命蒙混虧空得旨王新命白碩色等著拏付吏刑工三部嚴加議處○庚辰 上還京師○九卿等遵旨議覆河道總督張鵬翮奏節宣運河水勢應於張家

口裴家場中間開引河一道併力敵黃再蓄高家堰之水以助衝刷若黃水大發在糧艘正行之時將裴家場引河口門暫閉引清水由三汊河至文華寺入運河以濟運若在糧艘過完之後卽堵塞攔黃壩使不得倒灌應如所請 上諭大學士等前者朕曾以

此事諭于成龍于成龍並未遵旨挑濬今觀張鵬翮所奏甚是悉與前旨相符著照所請行○丙戌轉諭成龍爲工部左侍郎以許

汝霖爲工部右侍郎

由翰林院侍讀學士遷

○江西巡撫馬如龍以老病乞

休 上諭大學士等馬如龍雖年老居官尙好著行文總督阿山

問彼病勢如何及能否辦事具奏無事之時督撫之任仍宜漢人若漢軍費用太多於民無益惟有緊要事辦理敏速則漢軍所優也然如張鵬翮李光地居官更有何議張鵬翮自到河工在署之日甚少每日乘馬巡視隄岸不憚勞苦彭鵬人材亦甚壯健任三

河縣時但聞有賊卽帶刀乘馬親往擒拏毫無畏懼朕深知之○四川提督唐希順奏正月十三日臣抵打箭鑪有商民喇嘛番民等歸順又有木鴉頭目錯王端柱等首先歸順今來附者共一萬二千餘戶賞給銀幣鞍馬令其各回安業下部知之唐希順又奏參化林營參將李麟進兵打箭鑪之時規避畏縮違誤軍機又前於昭莫多與噶爾丹對敵時以無甲推諉不戰 上諭大學士等李麟人材壯健馬步射俱優係朕簡用之人打箭鑪未復之前李麟呈報總督席爾達云應分兵三路進取打箭鑪席爾達據以具奏今唐希順奏參李麟於進攻打箭鑪時規避誤機又追言康熙三十五年在昭莫多對敵時李麟以無甲自諉不前向與公費揚古同往出兵者其內並未聞有無甲不戰之人豈有已經遇敵以無甲自諉而不戰之理原任提督李鎮鼎與唐希順素不相能李



麟或係李鎮鼎提拔之人或與有關親誼以是挾仇奏參亦未可

定李麟不必拏問著交與總督席爾達察議具奏○以佟國勳爲

雲南布政使由江西按察使遷

三月戊子朔 上御經筵○壬辰以高緝睿爲福建布政使由湖北按察使遷

○丁酉禮部議覆河道總督張鵬翮請將 上諭治河事宜

敕下史館纂集成書永遠遵守應如所請 上諭大學士等朕以

河工緊要凡前代有關河務之書無不披閱大約泛論則易而實

行則難河性無定豈可執一法以治之惟委任得人相其機宜而

變通行之方有益耳今不計所言所行後果有效與否卽編輯成

書欲令後人遵守不但後人難以倣行揆之己心亦難自信且今

之河工雖漸有成緒尙未底績果如撲滅三逆蕩平噶爾丹之灼

有成功允宜勒之於書垂示後世今河工尙未告竣遽纂成書可

乎纂書之務且不必交翰林院卽著張鵬翮編輯呈覽○諭朕聽政四十餘年凡條奏之事稍有私意斷不能欺朕馬士芳特不喜漢軍居督撫之任故將王國昌等俱行參奏朕所知之漢人數員已盡置外任今郭琇病甚欲選一人代之尙患不得果如張鵬翮李光地郭琇者能有幾人若云漢人內人人皆優此亦不可原任福建巡撫宮夢仁居官無狀朕問李光地鄰省河南山東巡撫居官如何爾等有文移往來之事必能知之李光地言河南巡撫徐潮居官甚優山東巡撫王國昌雖無過人之才心性和平地方尙受其益果在地方安靜卽百姓之福矣○戊戌以常名揚爲安徽布政使由湖南按察使遷○己亥工部議覆河道總督張鵬翮奏唐埂六壩堵閉全完惟洪澤湖水勢盛出繞流武家墩此一帶至運口隄工必須作速加幫高厚又新大墩至裴家場向無隄工應剗築攔

湖壩一道方可束水敵黃濟運應如所請得旨依議速行○壬寅  
諭大學士等督撫奏銷錢糧疏內因銀數有一兩不符及四兩不  
符者該部輒議駁回事甚微細必待往來申奏然後改正殊覺多  
事嗣後錯誤十兩以內者部內行文改正不必議駁○戊申廣西  
巡撫蕭永藻陛辭 上諭彭鵬在廣西居官甚好爾可效彼所行  
爾前任廣東巡撫時通省盜案甚多每一案內牽連數百人俱罹  
法網頃黎人之地又復有事如此爾居官果善豈致有此等事乎  
爾所薦人員亦無當者嗣後薦人其辦事優長等語皆不必言但  
當擇清廉者舉之居官既廉辦事自善卽錢糧稍有未完百姓自  
爲彼勉力急供也爾其識之○命郎中馬爾漢等往喀爾喀教養  
諸蒙古等 上諭喀爾喀蒙古其性無常且不知足爾等至彼慎  
勿多與之物取悅彼等速冀朕知爾等豈有多物滿其願欲日後

不繼反招其怨故始應節其施與酌量行之至於教彼耕種亦甚緊要前此任事之人朕悉指訓爾等一一問明加意遵行可也○諭大學士近見督撫內張鵬翮李光地郭琇彭鵬華顯等居官最優阿山到任雖不久居官亦甚善徐潮自到河南聲名卽爾茂著頃彭鵬薦知縣三人彭鵬所舉定皆良吏張鵬翮李光地皆不輕於薦人惟恐薦後或有不法故甚鄭重之若干成龍則樂於薦人故常失之○河道總督張鵬翮以河工情形遣郎中王進楫奏聞上召問良久諭大學士等今天下無事惟治河最要唐埂六壩俱已堵塞去年夏秋時黃河水溢加之毛城鋪之水復入洪澤湖湖水較黃河畧高目下清水通洩雖於運般有益今歲桃花水發洪澤湖水已高三尺至夏秋時若水高至丈許則高家堰隄深可危慮儻高家堰一有衝決淮揚一帶地方俱不可保其爲患甚大

且所修如許工程亦皆付之無用矣昔于成龍任總河時不塞唐  
埧六壩非無所見蓋慮此而不行今斷不可不慎加防護也復顧  
王進楫曰爾往諭張鵬翮高家堰隄須加意防守不可卽謂工竣  
必歷夏秋至冬清水照常流通高家堰無事斯可云河工有濟耳  
○己酉諭大學士等莽牛河之水著引入永定河可交分司等照  
此修治將此修治之處傳諭巡撫李光地前來視之○癸丑刑部  
等衙門議覆直隸巡撫李光地奏參王新命白碩色修築永定河  
誤工擬王新命枷號鞭責白碩色擬革職 上諭大學士等議者  
輕矣此事並非科道糾參及諸臣察奏俱朕親行目覩者儻嚴訊  
白碩色及赫碩滋等王新命實情白露王新命係革職之人朕復  
舉用所行尙猶如此於聲名職分俱爲有玷其罪豈可輕擬乎白  
碩色雖無濟於事尙有建言之處王新命赫碩滋若不置之重典

嗣後誰勸誰懲諸臣甚屬徇庇本著發回再議○右衛將軍宗室費揚固奏請於右衛地方積貯米穀並請獻石青 上諭大學士等積貯米穀如所請行其石青不必進獻○先是九卿遵旨議覆河道總督張鵬翮奏河工官員三年保固請照臺灣例以應升之缺卽用應不准行得旨令張鵬翮將河官工程險易分別具奏至是張鵬翮分別工程險易仍請河官照臺灣例升用 上諭大學士等據張鵬翮奏稱上險次險等工程但水性靡常倏爾變遷歲修工程或變爲險要險要淤塞卽變爲歲修各官有實心效力者亦有隨眾塞責者豈可俱照臺灣之例一體敘用又言河員冒涉風濤與臺灣官員無異不知臺灣官員三年卽升之例並非僅爲風濤起見且河員見今俱係保奏從優補授之人若照臺灣例敘用必致吏兵工三部條例俱要更改況河工練員同時升去獨存

新任之員於河工有無裨益之處未經議及今河員已歷二載其  
限三年自從到任之日扣算儻自今歲明歲扣算再過三年張鵬  
翮能保尙在河工否接任河臣焉知從前官員賢否乃欲將河員  
遽爲升用乎其不可行之故可一一諭令張鵬翮知之○以李鴻  
爲廣西布政使

由浙江鹽運使遷

○丙辰先是給事中馬士芳奏參湖廣

巡撫年遐齡徇庇布政使任風厚老病不入大計至是年遐齡遵  
旨明白回奏 上諭大學士等任風厚調來引見其年尙未衰老  
可以辦事如爾諸臣俱係年老坐而辦事必得老成歷練者方能  
得當州縣官則不可若道員以上必以年長者爲佳不惟此也凡  
一省易一大吏一方百姓不能無累外官惟以清廉爲要而辦事  
和平如任風厚果係不堪郭琇豈肯徇庇任風厚仍赴原任至於  
言官參奏不實若皆交部議處嗣後誰復敢言原參官馬士芳著

免議年遐齡奏疏知道了

夏四月己未兵部議覆廣西巡撫彭鵬奏粵西歷年武科應試人少前撫臣請暫行停止今武生眾多請於壬午科仍開武科鄉試從之○甲子命內閣學士錢齊保等往土默特教養諸蒙古○戶部議覆廣西巡撫彭鵬奏舊例廣西採買熟鐵生銅解送京師康熙三十九年奉旨熟鐵已停解送今生銅亦請停解應不准行

上諭大學士等廣西路遙地險若令解送必至累民可如其所請折銀解部○諭頃聞甘肅提督雷繼祖病故朕深爲悼惜彼雖在任不久居官不下於孫思克今甘肅地方緊要固原提督李林盛雖已年邁居官甚優其人材亦與孫思克相等著調補雷繼祖缺李林盛缺著天津總兵官潘育龍升補潘育龍缺著將浙江定海總兵官藍理調補○庚午刑部等衙門議覆王新命在永定河監



修誤工浮冒銀一萬六千餘兩應擬斬監候赫碩滋係特差河工效力之人乃並不實意效力心口相違行事乖張應擬絞監候白碩色係監修部臣不思剔除弊端應革去佐領枷號鞭責從之○工部議覆河道總督張鵬翮奏遵旨堵閉六壩大開清口引清水會黃入海今三月清水盛出敵黃有餘但六壩閉後全湖蓄水隄岸危險應再加幫其天然滾水壩尙未開放欲其蓄水敵黃若湖水再長相機開放以保隄工清口水勢相連寬數百丈直繞大墩大墩一帶隄工關繫緊要令河工作速下埽加幫馬家港口門寬二十丈且留以洩溢槽之水俱應如所請從之○乙亥工部議覆河道總督張鵬翮奏自棠梨樹迤南至秦家高岡一帶隄工前河臣于成龍等因六壩未閉水勢東注此處地勢稍高未經估計加幫今六壩全堵湖水驟長通隄既經加高此處反覺卑矮必須照

六壩一律臨湖丁頭鑲柴以資捍禦應如所請從之○丙子刑部  
尚書王士正請假遷葬 上諭大學士等山東人性多偏執好勝  
挾仇昔李之芳孫光祀王清其仇迄今未解惟王士正則無是也  
其作詩甚佳居家除讀書外別無他事若令回籍殊爲可惜著給  
假五月不必開缺○丁丑 上巡視永定河啟鑾○戊寅 上閱  
竹絡壩河道諭直隸巡撫李光地等此莽牛河出水之口亦宜下  
埽防之隆冬冰結之時莽牛河口著照常開洩清水流於冰下則  
水爲冰所偏向下衝刷河底自然愈深又閱新修石隄諭曰朕修  
此石隄特欲其堅而更堅之意如此則河水斷不復歸舊河此地  
黎民亦可安枕矣又閱竹絡壩迤東河道大灣諭曰此地正當頂  
衝甚爲危險見今此處續修石隄尙未興工著速取南方運來杉  
木卽下排椿及埽堅固修築又諭曰觀新挑河道水流旣直出柳

岔口亦順河岸較前甚高而河亦深此皆被莽牛河水衝刷之故  
聞其地勢南岸最爲緊要故將應行堅修諸處詳行指示爾等勿  
謂已成而遂忽之○己卯 上閱子牙河○甲申以張聖猷爲雲

南按察使

由山東青州道遷

○乙酉

上還京師

五月戊子諭大學士等自古帝王用人行政皆賴大臣薦舉賢良  
盡事君之大義雖或薦舉偶有未當若爲所舉者因有賢吏之名  
遂力改所爲不負所舉斯卽良吏也若始以賢而舉之乃改行而  
爲不肖旣玷祖父之名復絕功名之路以致貽累於所舉斯則國  
家之大罪人也天下至大爲人君者焉能人人而識別之且官方  
賢否或操守清正或貪污不肖必難逃於眾論其居官卽此可知  
儻所舉之人居官皆善此乃實心爲國無私之賢臣也所舉有善  
有不善此其心雖爲國特識鑒未到之故耳若所舉皆貪污行私

此則大玷爲臣之義不可一日容於世者也辨別臧否以鼓勵賢行權在人主或居小吏時亦有善名及得志之後改行者甚多此則焉能豫料自茲以後朕惟視其居官操守清廉以爲實據無庸豫爲疑度也○工部議准河道總督張鵬翮請加修龍門大壩石工得旨依議速行○己丑先是山東巡撫王國昌以大計徇私爲給事中馬士芳糾參遵旨回奏下該部議至是吏部議覆馬士芳奏參王國昌所薦歷城縣知縣管承寵爲巡撫私人並無實據應毋庸議其徇庇溺職之長清縣知縣崔錫榮該撫於大計典內不卽奏參殊屬不合應將王國昌降一級准以加級抵銷從之○庚寅工部議准河道總督張鵬翮奏黃淮交會水勢加長修防工程倍加緊要時家馬頭童家營陳家社龍潭口歪枝套辛家蕩邢家河馬家港等處隄壩應行幫築挑挖引河以及釘樁下埽又奏准

黃水漲發由王家營減水壩洩入鹽河至平旺河入海今鹽河淤塞作速乘時挑築俱從之○壬辰河道總督張鵬翮奏遵諭挑濬下河引積水入海蝦鬚二溝爲疏通要道先行挑挖於四月二十六日開放完工下部知之○癸巳兵部奏黑龍江管水手執事官員缺以原任道員周昌等擬用 上諭大學士等黑龍江係罪人發配之所周昌等旣因罪革職又補烏喇地方終身不還似獲罪後復行遣發冤抑殊甚著該部查八旗見任官內有情願效力者具奏定限五年內如無過犯而又效力之處議敘優升始爲允當○甲午工部議准河道總督張鵬翮奏請加築高家堰清水潭月隄從之○戊戌工部議覆直隸巡撫李光地奏永定河南北兩岸設河兵二千名原備險工搶修防護乃兵遇緊急率多逃竄及水緩工停則又坐食糜餉今應揀選八百名其餘一千二百名裁去

餘餉一萬六千四百餘兩於工程緊時雇募附近民夫充用從之

○甲辰以于嗣昌爲浙江按察使

原任山東按察使

○裁陝西興安州城

守副將一守備一馬步兵三千名改設都司一把總二馬步兵三

百名○丁未安徽巡撫高承爵奏泗州等處水災 上諭大學士

等六壩堵塞其水必然注彼治東則西卽被災兩方之民俱同一

體朕閱河工時見高家堰之水較隄旁平地高三尺淮安之水較

地高九尺今高家堰之水較地已高五尺總而計之水高於地已

至一丈六七尺豈不可危今之所恃者隄耳隄雖極堅安保無意

外之虞若將高家堰之水稍有宣洩則清口之水如何能出今此

隄儻能一二年不遇水潦得以堅固清口之水將浮湧之沙刷淨

日久河底漸深方可無礙泗州盱眙被水之地令河道總督張鵬

翮會同江南江西總督阿山親往詳勘前者堵塞高家堰六壩時

朕慮堵之後泗州盱眙等處必被水災會諭九卿今六壩方閉洪澤湖水泛溢泗州盱眙等處城郭田畝果被水災高家堰隄益覺危險朕爲此時廬於懷萬一有異常風暴之事高家堰至於危險則揚州淮安等處皆被災矣朕日夜念此甚切憂懼高家堰隄作何保守堅固或另有修治善策著張鵬翮陳奏著遣中書一員齎諭前往○戊申御史張瑗奏西山碧雲寺後有前明太監魏忠賢墓並碑二座乞仆毀從之○己酉以劉廷璣爲江西按察使

由浙溫處道

處道

○辛亥諭大學士等御史杜之昂魏壽期所奏六本俱極尤

長奏章字俱有定額此本逾格凡言事但期明晰如將無用文章闌入何益李光地張鵬翮凡有奏章俱極簡當其節畧大指甚善今杜之昂欲將邵雍後裔授爲博士但數言可了若必將邵雍之賢一一舉出卽十疏豈能盡之魏壽期所奏漢中府地方民生本

極富庶自吳三桂反叛以來戶口逃散此言尤爲悖謬彼處自明朝末年爲流賊張獻忠屠戮殆盡自順治十七年至康熙十三年用兵始定歷年無幾則人民豈遽能生聚所奏俱著發還漢中府田糧之事魏壽期前任知縣時爲何不報督撫至於奏請州縣官初任後止許到省一次謁見總督巡撫若不時往來必致送禮及勒取之弊大約治道亦不在此內而大學士九卿外而督撫屬下之人豈俱不相往來若大臣無欲則屬下必廉豈關往來謁見之故也○王子直隸巡撫李光地奏承修永定河自郭家務至柳岔山開河築隄釘樁下埽七十餘里大城縣西隄樁埽工七十餘里又子牙河廣福樓新河至賈口等處兩岸隄工五十餘里雄縣水占民隄未完工程二十餘里今俱已完工又接修永定河石隄之下樁工一百餘丈及大城南隄並河間獻縣之工俱可告竣下部



知之○乙卯諭大學士等朕聞索岳爾濟山係名勝之山最爲高大今巡幸塞外朕欲乘便一往視之○丙辰 上巡幸塞外啟鑾六月甲子諭喀爾喀台吉等興安境內爾等數旗窮困已極自噶爾丹之事以來爾諸蒙古朕皆一體蒙養爾台吉內尙有無馬徒步者身係台吉何至如此爾蒙古等度日甚無成算今將台吉內有馬一騎者給牝馬九有二騎者給牝馬八有三騎者給牝馬七有四騎者給牝馬六有無騎者給牝馬五無馬貧窮台吉皆給牝馬十其乳既可取食所生馬駒又可各立生業八年後將所給原數仍交牧廠其孳生之馬爾等善爲畜養令其蕃息甚爲有益朕令爾等立業如此儻仍難度日雖彼蒼亦不能救爾也○丙寅賜喀爾喀四子部落阿霸垓阿霸哈納蘇尼特王台吉等衣幣沿途各藩來朝悉如之○庚辰授宋儒邵雍後裔世襲五經博士○癸

東華金  
未吏部奏兵部尙書馬爾漢等不擇肥馬撥給驛站止將羸瘦馬  
匹撥給應將尙書馬爾漢等俱革職 上諭大學士等兵部堂官  
不盡心辦事互相推諉殊屬無恥馬爾漢布雅努俱著革職留任  
效力朱都納行止不端不堪任用著革職